

आकाशवाणी

पैहले खास-खास खबरां:-

1. भारतीय चुना आयोग नै पच्छिम बंगाल दे 15 मतदान केन्द्रें पर अज्ज नमें सिरेया वोट पोआने दा हुकम जारी कीते दा ऐ। मतदान बड़लै 7 बजे दा जारी ऐ।
2. आंध्र-प्रदेश, अरुणाचल प्रदेश, हरियाणा, चंडीगढ़, मध्य प्रदेश ते छत्तीसगढ़ च जनगणना 2027 दे पैहले गेड़ तैहत घरें-मकानें दी गणना शुरु होई गेई ऐ।
3. मौसम विभाग नै अज्ज असम- मेघालय- सिक्किम ते पश्चिम बंगाल दे हिमालय दे तराई आले इलाकें च तेज बरखा दी संभावना दस्सी ऐ।
4. अमरीका दे राष्ट्रपति डोनाल्ड ट्रम्प होरें पच्छिम एशिया संघर्ष गी खत्म करने लेई ईरान दी भलेआ नमी पेशकश गी खारज करी दिता ऐ।
5. बैडमिंटन च डेनमार्क दे होर्सेन्स च खेड़टे जा रदे थॉमस कप 2026 दे सेमीफाईनल च भारतीय मर्दे दी टीम दा मकाबला अज्ज फ्रांस कन्नै होग।
6. फुटबॉल च भारतीय टीम AFC अंडर-17 महिला एशिया कप च अज्ज चीन च आस्ट्रेलिया खिलाफ अपना अभियान शुरु करोग।

<><><><><><>

ते हून खबरा विस्तार कन्नै:-

W.B-- Re-polling

भारतीय चुनाव आयोग नै पच्छिम बंगाल दे 15 मतदान केन्द्रों पर नमैं सिरेया वोट पोआने दा हुकम जारी कीते दा ऐ- जिंदे च मगराहट पच्छिम विधानसभा क्षेत्र दे 11 ते डायमंड हार्बर विधानसभा क्षेत्र दे 4 मतदान केन्द्र शामिल न। इनें सब्भनैं मतदान केन्द्रों पर अज्ज बड़लै 7 बजे दा मतदान शुरू होई चुके दा ऐ- जेहड़ा शामी 6 बजे धोड़ी जारी रौहग। आयोग नै दस्सेआ ऐ कि सरबन्धत मतदान अधिकारिणें ते निगरानें सवा हासल सूचनाएं दी बिनाह पर एह फैसला लैता गया ऐ। पच्छिम बंगाल विधानसभा चुनाव दे दुए गेड़ तैहत बुधवारें इनें मतदान केन्द्रों पर वोट पाए गे हे।

<><><><><><>

HLO

आंध्र-प्रदेश- अरुणाचल प्रदेश- हरियाणा- चंडीगढ़- मध्य प्रदेश ते छत्तीसगढ़ च जनगणना 2027 दे पैहले गेड़ तैहत घरें-मकानें दी गिनतरी दा कम्म शुरू होई गई ऐ। एह इनें राज्यें ते केन्द्र शासित प्रदेशें च आपू अपनी गिनतरी दे 15 दिनें दे नोटिस अवधि समाप्त होने मगरा शुरू होई ऐ। गृह मंत्रालय दा आखना ऐ जे एह कम्म 30 मई 2026 तगर जारी रौहग। एहदे तैहत सिखलाई हासल गिनतरी करने आलें घर-घर जाइयें जानकारी किट्ठी करडन। इस्सैं दौरान गै आपू अपनी गिनतरी आली सुविधा-नगर-निगम क्षेत्र दिल्ली- राजस्थान- महाराष्ट्र- मेघालय ते झारखंड च बी शुरू होई गई ऐ। एह सुविधा ऑनलाईन रुपै नै 15 मई तगर जारी रौहग। एहदे मगरा 16 मई शा 14 जून तगर घर-घर जाइयें जानकारी लैती जाहग। आपू अपनी गिनतरी आली सुविधा जनगणना 2027 च पैहली बारी शुरू कीती गई ऐ। इसी आम जनता दा भारी समर्थन

हासल ऐ। इस सुविधा दा आधिकारिक पोर्टल Se.census.gov.in पर तकरीबन 82 लक्ख परोआरें लाह हासल कीता ऐ।

<><><><><><>

IMD Weather

मौसम विभाग नै अज्ज असम- मेघालय- सिक्किम ते पश्चिम बंगाल दे हिमालय दे तराई आले क्षेत्र च तेज बरखा दी संभावना दस्सी गई ऐ। मैहकमे नै अरुणाचल प्रदेश- मणिपुर- मिजोरम- त्रिपुरा- नागालैंड- तमिलनाडू- पुदुचेरी- कराइकल- केरल ते माहे च बी भारी बरखा दी संभावना जताई ऐ। पूर्वी राजस्थान- मध्य प्रदेश- बिहार- छत्तीसगढ़- ओडिशा ते तटीय आंध्र प्रदेश च बिजली चमकने ते तेज ब्हाए चलने दी संभावना दस्सी दी ऐ। तटीय आंध्र प्रदेश त कर्नाटक च अज्ज गर्मी आला मौसम बने दा रेई सकदा ऐ।

तोंआई विभाग दा आक्खना ऐ जे जम्मू-कश्मीर च कल्लै थमां लेइयै 5 मई तगर मौसम बदलोखड़ा बने दा रौहग ते बरखा बरने ते अंधी झक्खड़ झुलने दे बी इमकान दस्से गेदे न। करसानें गी सलाह दिती गई ऐ जे ओह इस दौरान राई-बाई आले कम्मैं गी स्थगित करी देन। आकाशवाणी दे जम्मू संवाददाता नै जानकारी दिती ऐ जे मौसम विभाग नै अज्ज मौसम आमतौरा पर खुश्क रौहने दी पेशनगोई कीती ऐ। उआं हौली बरखा दे बी इमकान न। फही 6 मई कोला लेइयै 9 मई तगर मौसम आमतौरा पर खुश्क बने दा रौहग।

<><><><><><>

RBI-2000 Notes

भारतीय रिजर्व बैंक नै आखेआ ऐ बंद कीते गेदे 2 जहार रपे आले नोटें चा लगभग 98 इशारिया 4-7 प्रतिशत वापस आई गेदे न। इनें नोटें गी बंद होए दे लगभग 3 बरे होई गेन। नोट प्रबंधन बवस्था तैहत एह नोट 19 मई 2023 गी बंद कीते गे हे। ओल्लै इनें नोटें दा जारी संख्या साहब्बै मुल्ल 3 लख 56 जहार करोड़ रपे हा। ताजा आंकड़े मुजब 30 अप्रैल 2026 गी एह आंकड़ा 5 जहार 451 करोड़ रपे ऐ। नोट बटाने दी सुविधा भारतीय रिजर्व बैंक 19 इशू दफतरें च उपलब्ध ऐ। आर.बी.आई. नै साफ कीता ऐ जे कढाने ते वापस लैने दे बावजूद बी 2 जहार रपें दे नोट मान्य न।

<><><><><><>

Trump –Iran War

अमरीका दे राष्ट्रपति डोनाल्ड ट्रम्प होरें पच्छिम एशिया संघर्ष गी खत्म करने लेई ईरान दी भलेया नमीं पेशकश गी खारज करी दिता ऐ। ईरान नै बचौलिंग दी मदद कन्नै अपना नमां तरमीम कीते दा प्रस्ताव पेश कीता- जेहदी तस्दीक सरकारी मीडिया नै कीती ऐ। ट्रम्प होरें मन्नेया ऐ कि ईरान नै वार्ता च प्रगति कीती ऐ पर उ'नें आखेआ ऐ कि ओ इनें शर्ते गी लेइयै ओ संतुष्ट नैई ऐ। उ'नें ईरान दे नेतृत्व गी आपू गै बंडोए दा करार दिता। तोंआई लेबनान च इज़रायली हमले च इक्कै ध्याड़े 30 लोकें दे मारे जाने दी खबर ऐ। इनें हमले च दक्खनी शैहर टायर च सार्वजनिक ढांचे गी नशाना बनाया गया ऐ। परते च हिजबुल्ला नै इज़रायल दे उत्तरी हिस्सें च कई ड्रोन हमले कीते न जिंदे च कई इज़रायली सैनिकें दे घायल होने दी खबर ऐ।

<><><><><><>

CPC

8मां केन्द्रीय तन्खाह आयोग दा पैहली जून थमां 4 जून 2026 तगर श्रीनगर दा दौरा करने दा कार्यक्रम ऐ। इस सरबंध्य च 8में तनखाह आयोग दे निदेशक आसेआ जारी इक नोटिस च आखेआ गेआ ऐ जे सरबंध्यत हितधारक- जिंदे च केन्द्र सरकार ते जम्मू-कश्मीर दे संगठन ते संस्थान शामिल न- जेकर श्रीनगर च आयोग कन्नै गल्लबात करने दे इच्छुक न- ओह आयोग दी वेबसाईट <https://8cpc.gov.in> पर ज्ञापन जमा कराइयै 16 मई जां ओहदे शा पैहले मिलने लेई समां लेई सकदे न। एहदे लेई इक Unique Memo ID बी तयार कीती जाहग। मलाटी लेई थाहर ते समा आवदकें गी बाद च सूचित कीता जाहग।

<><><><><><>

Thomos Cup Badminton

ते हून बैडमिंटन! बैडमिंटन च डेनमार्क दे होर्सेन्स च खेड्डे जा'रदे थॉमस कप 2026 दे सेमीफाइनल च भारतीय मर्दे दी टीम दा मकाबला अज्ज फ्रांस कन्नै होग। भारत नै क्वाटर फाईनल च चीनी ताइपे गी 3-0 कन्नै रहाइयै सैमीफाईनल च अपनी थाहर पक्की कीती। लक्ष सेन नै पैहले मैच च चोऊ तिएन चेन गी रहाइयै भारत गी शानदार शुरुआत दोआई। एहदे बाद सात्विक साइराज रंकी रेडडी ते चिराग शेट्टी दी जोड़ी नै चियू हिसयांग चिएह ते वाग ची लिन गी रहाया। खीरै च आयुष शेट्टी नै लिन चुन यी गी रहाइयै टीम दी जित्त जकीनी कीती।

<><><><><><>

U-17 Women Asia Cup

फुटबॉल च भारतीय टीम AFC अंडर-17 महिला एशिया कप च अज्ज चीन च आस्ट्रेलिया खलाफ अपना अभियान शुरु करोग। भारत 2005 दे बाद पैहली बारी इस प्रतियोगिता च हिस्सा लै करदा ऐ। 17 बरे कोला हेठली उम्मी दी स्हाड़ी राष्ट्रीय टीम दा मैच भारतीय समें मताबक शामी 5 बजे शुरु होग। एह भारतीय महिला फुटबॉल लेई इक होर ऐतिहासिक मौका ऐ। भारत दी सीनियर टीम ते 20एं बरे कोला हेठली उम्मी दी टीम दे बाद भारत त्रीऽ बारी महिला एशिया कप च हिस्सा लै करदी ऐ। मुख् कोच पामेला कोटी नै आखेआ ऐ कि कैई महीनै दी त्त्यारी दे बाद टीम पूरे उत्साह कन्नै मैदान च उतरा करदी ऐ।



IPL

IPL क्रिकेट च जयपुर दे सवाई मानसिंह स्टेडियम च दिल्ली कैपिटल्स नै कल राजस्थान रॉयल्स गी 7 विकेटें कन्नै हराई दिता। एह IPL दे इतिहास च दिल्ली कैपिटल्स दा सब्भनै शा बड्डा रन्ज Chase ऐ। दिल्ली कैपिटल्स नै 19 ओवर इक गेंद च 3 विकेटें दे नुकसान पर गै 226 रन्ज दा लक्ष्य हासल करी लैता। दिल्ली कैपिटल्स लेई के.एल राहुल नै सब्भनै शा मते 75 रन्ज बनाए। के.एल राहुल गी प्लेयर ऑफ द मैच चुनेआ गेआ। पैहले बल्लेबाजी करदे होई राजस्थान रॉयल्स नै तय 20 ओवरें च 6 विकेटें दे नुकसान पर 225 रन्ज बनाए हे। राजस्थान रॉयल्स लेई कप्तान रियान पराग नै सब्भनै शा मते 90 रन्ज बनाए। तौंआई IPL क्रिकेट च अज्ज चेन्नेई च शामी साडडे 7 बजे कोला चेन्नेई सुपर किंग्स दा मुकाबला मुम्बई इंडियन्स कन्नै होग।

<><><><><><>